

四庫全書

子部

欽定四庫全書

太平御覽卷八十三

宋 李昉等 撰

皇王部八

殷帝成湯

帝外丙

帝仲壬

帝太甲

帝沃丁

帝太庚

帝小甲

帝雍己

帝太戊

帝仲丁

帝外壬

帝河亶甲

帝祖乙

帝祖辛

帝沃甲

帝祖丁

帝南庚

帝陽甲

帝盤庚

帝小辛

帝小乙

帝武丁

帝祖庚

帝祖甲

帝廩辛

帝庚丁

帝武乙

帝太丁

帝乙

帝紂

殷帝成湯

史記曰殷之祖契

音薛

母曰簡狄有娥氏之女為帝嚳次

妃三人行浴見玄鳥墮其卵簡狄取吞之因孕生契契

長而佐禹治水有功舜乃命契曰百姓不親五品不遜

汝為司徒而敬敷五教五教在寬封於商賜姓子氏契

興於唐虞大禹之際功業著於百姓百姓以平契卒子
昭明立昭明卒子相土立相土卒子昌若立昌若卒子
曹圉立曹圉卒子冥立冥卒子振立振卒子微立微卒
子報丁立報丁卒子報乙立報乙卒子報丙立報丙卒
子壬立壬卒子癸立壬卒子天乙立是為成
湯

帝王世紀曰成湯一名帝乙豐下銳上指有胼倨身而
揚聲長九尺臂四肘有聖德諸侯有不義者湯從而征

之誅其君弔其民天下咸服故東征則西夷怨南征則北狄怨曰奚為而後我故仲虺誥曰徯我后后來其蘇也凡二十七征而德施於諸侯及夏桀無道湯使人哭之桀因湯於夏臺而後釋之諸侯由是咸叛桀附湯同日貢職者五百國三年而天下悉服湯自伐桀後大旱七年洛川竭使人持三足鼎祝於山川曰愆不節與使民疾與苞直行與讒夫昌與宮室營與女謁行與何不雨之極也殷史卜曰當以人禱湯曰吾所為請雨者民

也若必以人禱吾請自當遂齋戒剪髮斷爪以己為牲
禱於桑林之社曰唯予小子履敢用玄牡告于上天后
土曰萬方有罪罪在朕躬朕躬有罪無及萬方無以一
人之不敏使上帝鬼神傷民之命言未已而大雨至方
數千里

河圖曰扶都見白氣貫月感生黑帝湯

詩含神霧帝
王世紀並同

雒書靈淮聽曰黑帝子湯長八尺一寸或曰七尺連珠

庭臂二肘

春秋元命苞曰湯臂二肘是為神剛

又曰湯之時其民大樂其救之於患害故樂名大護護

者救也

尚書璇璣鈴曰湯受金符白狼銜鈎入殷朝

鈎縛束之要明湯得天下

之要也

尚書中候曰天乙在亳諸隣國極負歸德東觀于洛降

三分沉璧

降下也以厚三分之璧五沉雜水

退立榮光不起

沉畢退而立候神榮

光不起

黃魚雙躍出濟于壇

魚者無足翼言祭孤持無黨可伐也黃者土色土所以通

水今土歸湯則金助矣濟上也雖祭猶為位告神故有壇黑鳥以雄隨魚亦止黑鳥黑帝叶光

紀之使化為黑赤玉勒曰玄精天乙受神福伐桀克化

也勒刻也三年天下悉合諸侯悉合歸之

又曰玄鳥翔水遺卵于流城簡拾吞生契封商玄鳥燕也翔水

徘徊於水上城氏也簡簡狄也詩云天命玄鳥降而生商是也契母名商國名

書曰伊尹相湯伐桀升自陲遂與桀戰于鳴條之野

又曰自契至于成湯八遷湯始居亳從先王居

尚書大傳曰湯之君民聽寬而獄省

又曰夏人飲醉者持不醉者不醉者持醉者相和而歌

曰盍歸于亳盍歸于亳亳亦大矣故伊尹退而間居深

聽樂聲

思其故也是時伊尹任桀

更曰覺兮較兮吾大命格兮

覺乃謂先

知者較兮爲直道者格至也

去不善而就善何樂兮伊尹入告于桀

曰天命之亡有日矣桀啞然笑曰天之有日猶吾之有民也日亡吾亦亡矣是以伊尹遂去夏適湯

又曰湯放桀也居中野士民皆奔湯桀與其屬五百人南徙千里止於齊齊士民往奔湯桀與其屬五百人徙

於魯魯士民復奔湯桀曰國君之有也吾聞海外有人
與五百人俱去

又曰湯放桀而歸於亳三千諸侯大會湯取天子之璽
置之於天子之坐左復而再拜從諸侯之位湯曰此天
子之位有道者可以處之矣夫天下非一家之有也唯
有道者之有也唯有道者宜處之湯以此三讓三千諸
侯莫敢即位然後湯即天子之位

韓詩內傳曰湯馮天子十三年年百歲而崩葬於微今

扶風徵陌是也

春秋演孔圖曰夏民不康天果命湯白虎戲朝白雲入

房

白虎白雲
皆金精也

紀年曰湯有七名而九征

說苑曰湯欲伐桀伊尹請且乏貢職以觀夏動桀怒起九夷之師伊尹曰未可彼尚能起九夷之師是罪在我也湯乃謝服入貢職明年又乏貢職桀起九夷之師九夷之師不起伊尹曰可矣湯乃興師

越絕書曰湯行仁義敬神鬼天下之民一心歸之

孟子曰湯居亳與葛為隣葛伯放而不祀湯使人問之
曰何為不祀曰無以供犧牲也湯使遺之牛羊葛伯食
之又不以祀湯又問之曰無以供粢盛也湯使亳眾往為之
耕老弱饋食葛伯率其民要其有酒食黍稻者奪之不授
者殺之有童子以黍肉餉殺而奪之書曰葛伯仇餉此
之謂也為其殺是童子而征之四海之內皆曰非富天
下也為匹夫匹婦復讐也

言不以天下為富為一夫一婦報讐也

又曰湯始

征自葛載十一征而無敵於天下東面而征西夷怨南面而征北狄怨曰奚為後我民望之若大旱之望雨也歸市者弗止芸者不變誅其君吊其民如時雨降民大悅書曰徯我后后來其無罰

尸子曰湯之救旱素車白馬布衣身嬰白茅以身為牲當此時也絃歌鼓舞者禁之

呂氏春秋曰湯見祝網者置四面其祝曰從天墜者從地出者從四方來者皆入吾網湯曰嘻盡之矣非桀其

孰能為此乃命收其三面置其一面更教祝之曰昔蛛
蝥作網罟今之人學紆欲左者左欲右者右欲高者高
欲下者下吾取其犯命者漢南之國聞之曰湯之德及
禽獸矣於是四十國同時歸之夫人置四面未必得鳥
湯去三面已網四十國非徒網鳥也

又曰成湯之時有穀生於庭昏生比旦而大拱史請卜
其故湯曰吾聞祥者福之先也見祥而為不善則福不
至妖者禍之先也見妖而為善則禍不至於是早朝晏

退問疾弔喪鎮撫百姓三日而穀亡

又曰湯誅桀功名大成乃命伊尹作為大護歌晨露修九韶六列以見其善

淮南子曰湯夙興夜寐以致聰明輕賦薄斂以寬民命布德施惠以賑窮困弔死問疾以養孤孀百姓親附政令流行

帝外丙

史記曰帝外丙即位二年崩立外丙之弟是為帝仲壬

紀年曰外丙勝居亳

帝仲壬

史記曰帝仲壬即位四年崩伊尹乃立太丁之子太甲
太甲成湯適長孫也

璣語曰仲壬四年崩伊尹放太甲

帝太甲

史記曰帝太甲既立三年不明暴虐不遵湯法亂德尹
放之桐宮伊尹攝行政當國以朝諸侯太甲居桐三年

悔過自責反善於是伊尹乃迎太甲而授之政太甲修德諸侯咸歸殷百姓以寧伊尹嘉之乃作太甲三篇褒帝太甲稱太宗

尚書曰太甲既立不明伊尹放諸桐三年復歸于亳思

庸

念帝道也

帝王世紀曰太甲反位又不怨故更尊伊尹曰保衡即春秋傳所謂伊尹放太甲卒為明王是也太甲修政殷道中興號太宗孔叢子所謂憂思三年追悔前愆起而

即政謂之明王者也一名祖甲享國三十三年年百歲
帝王紀曰桐宮蓋殷之墓地有離宮可居在鄴西南杜
預春秋後序曰紀年稱殷仲壬即位居亳其卿士伊尹
放太甲于桐乃自立伊尹即位於太甲七年太甲潛出
自桐殺伊尹

帝沃丁

史記曰帝沃丁之時伊尹卒既葬伊尹于亳咎單遂訓
伊尹事作沃丁

紀年曰沃丁絢即位居亳

帝王世紀曰伊尹卒大霧三日沃丁葬以天子禮喪之
三年以報大德

帝太庚

史記曰帝太庚在位二十五年崩子帝小甲立

紀年曰小庚辯即位居亳

即太庚也

帝小甲

史記曰帝小甲在位十七年崩弟雍己立

紀年曰小甲高即位居亳

帝雍己

史記曰帝雍己在位十二年崩弟太戊立

紀年曰雍己卽即位居亳

帝太戊

書叙傳曰伊陟相太戊

伊陟伊尹子也

亳有祥桑穀共生于朝

祥妖怪也二本合

生日共不恭之罰

詩序曰烈祖祀中宗也

祀中宗殷王太戊湯之玄孫也

嗟嗟烈祖有秩

斯祜

秩常也嗟嗟
嘆美之深也

史記曰帝太戊立亳有祥桑穀共生於朝一暮大拱帝太戊懼問伊陟伊陟曰臣聞妖不勝德帝之政其有闕歟帝其修德太戊從之而祥桑枯死而去殷復興諸侯歸之故稱中宗中宗在位七十五年崩子仲丁立

帝仲丁

史記曰帝仲丁遷於敖河曹甲居相祖乙遷於耿帝仲丁在位十一年

紀年曰仲丁即位元年自亳遷于囂

帝王世紀曰仲丁陟囂或曰教今河南之教倉是也

帝外壬

史記曰帝外壬在位一十五年崩弟河亶甲立

紀年曰外壬居囂

帝河亶甲

書叙傳曰河亶甲居相

孔安國曰相地在河北

史記曰帝河亶甲時殷復衰河亶甲在位九年崩子帝

祖乙立

紀年曰河亶甲整即位自囂遷于相征藍夷再征班方

帝祖乙

書叙傳曰祖乙圮于耿

圮毀也圮于耿遷于耿也河水所毀曰圮帝王世紀曰今河東

皮氏有

耿鄉

史記曰帝祖乙立殷復興巫賢任職祖乙在位十九年

紀年曰祖乙勝即位是為中宗居庇

帝王世紀曰帝祖乙以乙日生故謂之帝乙孔子所謂

五世之外天之錫命疏可同名者也是以祖乙不為諱
蓋殷禮也

帝祖辛

史記曰帝祖辛在位十六年崩弟沃甲立

帝沃甲

史記曰帝沃甲在位二十五年崩立祖辛之子祖丁

紀年曰帝開甲踰即位居庇

帝祖丁

史記曰帝祖丁在位三十二年崩立沃甲之子是為南
庚

紀年曰祖丁即位居庇

帝南庚

史記曰帝南庚在位二十九年崩立祖丁之子陽甲

紀年曰南庚自庇遷于奄

帝陽甲

史記曰帝陽甲之時殷衰自仲丁以來廢嫡而更立諸

弟子弟子或爭相代立比九世亂諸侯莫朝帝陽甲在位七年崩弟盤庚立

紀年曰陽甲即位居亳

帝盤庚

書曰盤庚五遷將治亳殷

自湯至盤庚凡五遷都治亳殷也

民咨胥怨

胥相也民不欲徙乃咨嗟憂愁相與怨其上也

史記曰帝盤庚之時殷已都河北盤庚渡河南復居成湯之故居乃五遷無定處殷民咨胥皆怨不欲徙遂涉

河南治亳行湯之政然後百姓由寧殷道復興諸侯來朝以其遵成湯之德也在位二十八年崩弟小辛立紀年曰盤庚旬自亳遷于北蒙曰殷

帝王世紀曰帝盤庚徙都殷始改商曰殷又曰亳殷今偃師是也然則殷有三亳二亳在梁國一亳在河南穀熟為南亳即今都也蒙為北亳即景亳湯所盟地偃師為西亳即盤庚所徙者

帝小辛

史記曰帝小辛立殷道復衰百姓思盤庚乃作盤庚三篇小辛在位二十一年崩弟小乙立

紀年曰小辛頌位居殷

帝小乙

史記曰帝小乙在位二十八年崩子武丁立

紀年曰小乙斂居殷

帝武丁

書叙傳曰高宗夢得說

盤庚弟小乙子也名武丁夢得賢相其名說

使百工

營求諸野得諸傅巖

書大傳曰桑穀俱生于朝一日而大拱

兩手檢之曰拱

武丁召

其相而問焉其相曰吾雖知之吾不能言也問諸祖已

曰桑穀理草也

此木也而云草未聞劉氏以為屬草妖

野草生于朝亡乎

武丁側身修行思昔先王之政興滅國繼絕世舉逸民

明養老之禮諸侯重譯來朝者六國

九州之外曰國

武丁祭成

湯有飛雉升鼎耳而雉問祖已祖已曰野鳥不當升鼎

欲為用也則遠方有來朝乎三年編髮重譯來朝者六

國孔子曰吾於高宗彤日見德有報之疾

彤日尚書篇名

史記曰帝武丁即位思復興殷而未得其佐三年不言政事事決定於冢宰以觀國風武丁夜夢得聖人名曰說以夢所見視羣臣百姓皆非也於是使百工營求之野得說於傅巖中是時說為胥靡築於傅巖見於武丁武丁曰是也得而與之語果聖人舉以為相殷國大治武丁祭成湯明日有飛雉登鼎耳而雉武丁懼祖己曰王勿憂先修政事祖己乃訓王武丁崩祖己嘉其德立

其廟為高宗

帝王世紀曰武丁即位諒闇居凶廬百官總已聽於冢
宰三年不言既免哀猶不言羣臣諫武丁於是思建良
輔夢天賜賢人姓傅名說乃使百工寫其像求諸天下
見築者胥靡衣褐帶索役于虞號之間傅巖之野名說
登以為相享國五十九年年百歲初高宗有賢子孝己
其母早死高宗惑後妻言放而死天下哀之

帝祖庚

史記曰帝祖庚在位七年崩弟祖甲立

紀年曰祖庚躍居殷

帝祖甲

史記曰帝祖甲淫亂殷復衰在位十六年崩弟廩辛立
紀年曰帝祖甲載居殷

帝王世紀曰春秋外傳所謂玄王勤商十有四世帝祖
甲亂之七世而隕是也

帝廩辛

史記曰帝廩辛在位六年崩弟庚丁立

紀年曰廩辛先居殷

帝庚丁

史記曰帝庚丁在位三十一年崩子武乙立殷復去亳徙河北

紀年曰庚丁居殷

帝武乙

史記曰帝武乙無道為偶人謂之天神與之博令人為

行天神不勝乃戮辱之為革囊盛血仰而射之命曰射天武乙獵於河渭之間暴雷震死子太丁立

紀年曰武乙即位居殷三十四年周王季歷來朝武乙賜地三十里玉十穀馬八匹

帝王世紀曰帝武乙復濟河北徙朝歌

帝太丁

史記曰帝太丁在位三年崩子帝乙立

紀年曰太丁三年洹水一日三絕

帝王世紀曰帝文丁一曰太丁

帝乙

史記曰帝乙立殷益衰帝乙長子曰微子啓母賤不得嗣少子辛辛母正后辛為嗣帝乙崩子辛立天下謂之紂

紀年曰帝乙處殷二年周人伐商

帝王世紀曰帝乙有二妃正妃生三子長子微子啓中曰微仲行小曰受庶妃生箕子年次啓皆賢初啓母之

生啓及仲也尚為妾及立為后乃生辛帝乙以啓賢且長欲以啓為太子太史據法爭之帝乙乃立辛為太子帝乙即位三十七年

帝紂

書曰武王戎車三百兩虎賁三千人與受戰于牧野

周書曰商王紂取天智玉琰五班環身以自焚

天王之智環身

上美者班以自焚也

春秋文耀鉤曰牧野之戰鬼哭

牧地鬼先哭喻紂將死

論語子貢曰紂之不善不如是之甚也是以君子惡居
下流天下之惡皆歸焉

史記曰紂資辯捷疾聞見甚敏材力過人手格猛獸智
足以拒諫言足以飾非矜人臣以能高天下以聲以為
人皆出己之下好酒淫樂嬖於婦人愛妲己使師涓作

新淫聲北里之舞靡靡之樂厚賦稅以實鹿臺之錢而

盈鉅橋之粟

鹿臺臺名
鉅橋倉名

以西伯昌九侯鄂侯為三公九

侯有好女人之紂九侯女不熹淫紂怒殺之而醢九侯

鄂侯爭之彊辨之疾并脯鄂侯西伯昌聞之竊歎崇侯
虎知之以告紂紂囚西伯美里及武王伐紂紂兵敗績
走入登鹿臺衣其寶玉赴火而死

紀年曰帝辛受居殷

帝王世紀曰帝紂能倒曳九牛撫梁易柱有蘇氏叛紂
因伐蘇蘇人以美女妲己奉紂紂大悅赦蘇而納妲己
為妃常與沉醉于酒所譽者貴所憎者誅淫縱愈甚始
作象箸箕子為父師歎曰為象箸必不美於土匭必為

犀玉之杯食熊蹯豹胎必不衣短褐處茅屋之下必將
衣文繡之衣遊於九層之臺居於廣室之中矣居五年
紂果造傾宮作瓊室瑤臺飾以美玉七年乃成其大三
里其高千丈其大宮百其小宮七十三處宮中九市車
行酒馬行炙以百二十日為一夜六月發民獵於西山
居期年天下大風雨飄牛馬壞屋樹天火燒其宮兩日
並出或鬼哭或山鳴紂不懼愈慢神誅諫士為長夜之
飲七日七夜失志歷數不知甲乙問於左右莫知使問

箕子箕子謂人曰為天下主而一國皆失日天下危矣
一國不知而我其危矣宰人以醢熊蹯不熟紂怒殺宰
人斮朝涉之脛而視其髓剝孕婦之腹而觀其胎又殺
人以食虎諸侯或叛妲己以罰輕欲紂重刑乃先為大
罍斗以火爇之使人舉輒爛手不能勝紂怒乃更為銅
柱以膏塗之加于爇炭之上使有罪者緣焉足滑墮跌
火中紂與妲己笑為樂名曰炮烙之刑武王乃率諸侯
來伐紂紂有億兆夷人起師自容閭至浦水與同惡諸

侯五十國凡七十萬人拒周于商郊之牧野紂師皆倒
戈而戰紂即位三十二年正月甲子敗績赴宮登鹿臺
蒙寶衣玉自投于火而死周武王封其子武庚為殷後
六韜曰武王伐殷得二大夫而問之曰殷國將亡亦有
妖乎一人曰殷國常雨血雨灰石小者如雞子大者如
箕常六月而雨雪深尺餘武王曰大哉妖也殷人對曰
非殷國之大妖也殷國大妖三十六章殷君喜射人喜
以人食餽虎喜剖人心喜殺孕婦以信者為不信以誣

者為真以忠者為不忠忠諫者死阿諛者賞以君子為下以小人為上以佞辯為相以女子為政急令暴取萬民愁苦喜田獵走狗試馬出入不時不避大風甚雨不避寒暑喜修治池臺日夜無已喜為酒池肉丘牛飲者三千人飲之以金鼓坐起無長幼之序貴賤之禮聽讒用譽無功者賞無德者富所愛專制擅令無禮義無聖人無賢士無衡概無升斛無尺寸無錙銖有罪放無罪誅此殷國之大妖其餘不可勝數臣言不能盡

墨子曰昔殷王紂貴為天子富有天下上訶天侮神鬼
下殃傲天下萬民武王遂奔入宮擒紂而出繫之赤環
載之白旗以為天下諸侯僇

又曰紂之時十日雨土于亳有鬼宵吟有男女焉

闕

子曰桀紂逆天暴萬物故天棄之故民去之湯武從

天理萬物故天欲之故民歸之紂昏昏以亡武王諤諤
以昌

淮南子曰紂之城左東海右流沙前交趾後幽都師起

容閭至浦水億有餘萬武王左操黃鉞右執白旄而麾之則瓦解而走遂土崩而亡有南面之名而無一人之警此失天下也

太平御覽卷八十三

欽定四庫全書

太平御覽卷八十四

宋 李昉等 撰

皇王部九

周文王

武王

成王

周文王

史記曰周后稷名棄其母有邠氏女曰姜嫄姜嫄為帝

啓元妃姜嫄出野見巨人跡心忻然悅之遂踐之而孕
居期而生子以為不祥棄之隘巷牛羊過者皆避不踐
徙置林中適會山林多人遷之而棄渠中冰上飛鳥以
其翼覆薦之姜嫄以為神遂收養之因名為棄棄為兒
時遊戲好種樹麻菽麻菽溢美及成人好耕農相地之
宜穀者稼穡焉堯聞之舉為農師天下得其利封之於
邠號曰后稷別姓姬氏后稷之興在唐虞之際皆曰有
令德后稷卒子不窋陟律反立不窋末年夏后氏政衰去

稷不務不窋失其官而奔戎狄之間不窋卒子鞠立鞠
卒子公劉立公劉雖在戎狄之間復修后稷之業務耕
種行地宜百姓懷之多從而保歸焉周道之興自此公
劉卒子慶節立國於豳九世至古公亶父復修后稷公
劉之業積德行義國人皆戴之獯音勳鬻音育戎狄攻之欲
得地與民皆怒欲戰古公曰有民立君將以利之今
戎狄所為攻戰以吾地與民民之在我與在彼何異民
欲以我故戰殺人父子而君之予不忍為乃與私屬去

幽渡漆沮踰梁山止於岐山幽人舉國扶老攜弱盡歸於岐下及他旁國聞古公仁亦多歸之於是古公乃貶戎狄之俗營築城郭室屋而邑別居之民皆歌頌其德古公有長子曰泰伯次曰虞仲

尚書帝命驗曰季秋之月甲子赤雀銜丹書入豐止昌

戶拜稽首

稽首頭至地也

至于磻谿之水呂尚釣涯

呂氏尚名

王下

趣拜也

急見

曰公望七年

曰公望我相望七年言久也

乃今見光景于

斯

尊之辭斯此也

答曰望釣得玉璜

半璧曰璜釣得魚中有璜

刻曰姬受命

呂佐旌

受天命為天子
呂佐旌理之也

遂置車左王躬執馭

下賢也車
尊曰左王

身執轡而驅馬號曰師尚父

周書曰文王昌曰吾聞之無變古無易常無陰謀無擅制無更創為此則不祥太公曰夫天下非常一人之天下也天下之國非常一人之國也莫常有之惟有道者取之古之王者未使民民化未賞民民勸不知怒不知喜愉愉然其如赤子此古善為政也

又曰文王在鎬召太子發曰嗚呼我身老矣吾語汝我

所保與我所守傳之子孫吾厚德而廣惠忠信而志愛
吾不為驕侈不為泰靡不淫於美吾枯柱而茅茨吾為
民愛費也太姜生少子季歷季歷娶太任皆賢婦人生
昌有聖瑞古公云我世當有興者其在昌乎長子太伯
虞仲知父欲立季歷古公卒季歷立是為王季王季修
古公之道篤於行義諸侯賴之王季卒子昌立是為西
伯西伯曰文王遵后稷公劉之業則古公王季之法篤
仁敬老慈幼禮下賢者日中不暇食以待士伯夷叔齊

太顛閔夭散宜生鬻子辛甲之徒皆歸之崇侯虎諧於紂曰西伯積善累德諸侯嚮之將不利於帝紂乃囚西伯於羑里閔夭之徒乃求有莘氏美女驪戎之文馬因殷嬖臣費仲獻之紂紂乃大悅赦西伯賜之弓矢斧鉞使專征伐謂西伯曰懃汝者崇侯虎也西伯乃獻洛西之地以請去炮烙之刑諸侯皆來決平虞芮之人有獄不能決乃如周人界耕者皆讓畔民俗皆讓長未見西伯而慙相謂曰吾所爭周所恥也遂還明年伐犬戎又

明年伐密須明年敗者國明年伐郭明年伐崇侯虎而作豐邑自岐徙豐明年西伯崩太子發立

帝王世紀曰文王昌龍顏虎肩身長十尺曾有四乳晏朝不食以延四方之士文王合六州之諸侯以朝紂紂以崇侯之讒而怒諸侯請送文王棄于程十年正月文王自商至程太似夢見商庭生棘太子發取周庭之梓樹之于闕間梓化為松柏柞械覺而驚以告文王文王不敢占召太子發命祝以幣告于宗廟羣神然後占之

于明堂及發並拜吉夢遂作程寤始文王繼父為西伯
都于雍州之地及受命復兼梁荆二州化被于江漢之
域於是諸侯附之者六州而文王不失臣節先是文王
夢日月之光著身又鸞鷲鳴於岐作武象之樂神農氏
始作五絃之琴以具宮商角徵羽之音歷九代至文王
復增其二絃曰少宮少商文王嗣位五十年即周書所
謂文王受命享國五十年是也

雒書靈准聽曰蒼帝姬昌日角烏鼻身長八尺二寸以

成草木之長而順天時水澤不內舟楫以成魚鼈之長
不麝不卵以成鳥獸之長畋獵惟時不殺童羊不夭胎
童牛不服童馬不馳不騫澤不行害事不失其宜萬物
不失其性天下不失其時

又曰文王獨坐屏去左右深念遠慮召太公望曰帝王
猛暴無文強梁好武侵凌諸侯苦勞天下百姓之怨心
生矣其教予奚行而得免於無道乎太公曰因其所為
且興其化上知天道中知人事下知地理乃可以有國

焉

詩曰文王在上於昭于天周雖舊邦其命維新

又曰維此文王小心翼翼昭事上帝聿懷多福

又曰文王曰咨咨汝殷商匪上帝不時殷不用舊

詩含神霧曰太任夢長人感己生文王

春秋元命苞曰文王龍顏柔肩望羊

柔肩言象龍膺曲起

又曰伐殷者為姬昌

姬昌之言基始也昌兩日重見言明象

生於岐立於

豐

岐雍州之山最大者也

精翼日

為日精所羽翼故遂以為名也

衣青色

木神以其方色

表遷造西十刻消

遷造西蓋文王為西伯時東方造意東入討紂十刻之間即消滅之言聖

人所向無前也

又曰文王四乳是謂含良蓋法酒旗布恩舒惠

酒者乳也能乳

天下布恩之謂也

春秋感精符曰孔子按錄書含觀五常英人知姬昌為

蒼帝精

孟子曰昔者文王之治岐也耕者九一仕者世祿關市

譏而不征澤梁無禁罪人不孥

言往者文王為西伯時始行王政使岐民修井

田八家耕八百畝其百畝以為公田及廬井故曰九一也紂時稅重文王復行古法也任者世祿賢者子孫必有土地關以譏察非常不征稅也孀妻子也詩云樂爾妻孀罪人之子不孀惡惡止其身不及妻子也陂澤魚

梁不設禁與民共也

老而無妻曰鰥老而無夫曰寡老而無子曰

獨幼而無父曰孤此四者天下之窮民而無告者文王發政施仁必先斯四者

墨子曰赤雀銜珪降周之岐社命曰周文王伐殷

韓子曰周有玉板紂令索之

又曰昔文王侵孟克莒舉豐三事而紂惡之文王懼請

入雒西地赤壤之國方千里以請解炮烙之刑天下皆
悅仲尼曰仁哉文王輕千乘之國而請解炮烙之刑也
文王疾羣臣請對曰興事動衆以增城王曰是重吾罪
也不可也昌請改行重善以移之其可以免乎於是謹
其禮秩皮革以交諸侯飾其辭令幣帛以禮俊士頒其
爵列等級田疇以賞羣臣行無幾何疾乃止

淮南子曰文王歸自商乃為玉門築靈臺相女童鐘鼓

玉門以玉飾門為柱
樞也相女童視之也

以待紂之失也紂聞之曰周伯昌

改道易行吾無憂矣乃為炮烙剖比干剔孕婦殺諫者
文王乃遂其謀

又曰文王之時紂為天子賦斂無度殺無止康梁流酒
宮中成市

康梁醉樂流酒酒也成市言集者多

作為炮烙之刑剗諫者剔

孕婦天下同心而苦之文王四世累善

大王王季文王武王凡四世也

修德行義處岐周之間地方不過百里天下二分歸之
文王欲以卑弱制強暴以為天下去殘除賊而成王道

蓋太公為謀主也

太公為周陳陰符兵謀也

賈誼書曰文王晝卧夢人登城而呼己曰我東北陬之腐骨也速以人君葬我文王曰諾覺召吏視之信有焉文王曰速以人君葬之吏曰此無主請以大夫文王曰吾夢中已許之矣奈何其背也士民聞之曰我君不以夢之故背腐骨況於生人乎

桓子新論曰文王操者文王之時紂無道爛金為格溢酒為池宮中相殘骨肉成泥璇室瑤臺藹雲翳風鐘聲雷起疾動天地文王躬被法度陰行仁義援琴作操故

其聲紛以擾駭角震商琴操曰受命者謂文王受天命
文王以紂時為岐侯躬修道德執行仁義百姓附親是
時紂為無道剝胎斲廢壞三仁人天統易運諸侯瓦
解昏歸文王其後有鳳凰銜書於郊文王曰殷帝無道
虐亂天下皇命已移不得復久乃作鳳凰歌曰翼翼翔
翔翔鸞皇兮銜書來遊以命昌兮瞻天按圖殷將亡兮
蒼蒼昊天始有萌兮五神連精合謀房兮

又曰文王修德百姓親附是時崇侯虎與文王列為諸

侯德不及文王常嫉妬之乃譖文王於紂曰西伯昌聖人也長子發中子旦皆聖人也三聖合謀君其慮之乃囚文王於羑里

呂氏春秋曰周文王使人扣地得人之骸吏以聞文王文王令葬之吏曰此無主矣文王曰有天下者天下之主有一國者一國之主今我非其主耶遂令以衣棺葬之天下聞之曰澤及枯骨況於人乎或得寶以危其國文王得朽骨以喻其意故聖人之於物也無不材也

又曰文王處岐事紂寬侮雅孫朝夕必時

雅正孫順紂雖寬枉而侮

慢之而文王猶正順諸侯之禮而不失其時也

正貢必適祭祀必敬紂喜命文

王稱西伯賜之千里之地文王再拜稽首而致辭曰願

為民請去炮烙之刑

紂見熨斗爛人手因作銅柱布火於下令人走其上墮火而死以之

為樂方之脫炮故名為炮烙也

文王非惡千里之地也以為民請

去炮烙之刑必得民心得民心則賢於千里之地矣

又曰周文王立八年歲六月文王寢疾五日而地動東

西南北不出周郊百吏皆請曰臣聞地之動也為人主

也今王寢疾五日而地動四面不出周郊羣臣皆恐請
移之文王曰若何其移囚於羑里紂將欲殺之於是文
王四臣散宜生等周流海內經歷風土得美女二人水
中文具白馬朱鬣以獻於紂陳於中庭紂立出西伯文
王在羑里時演易八卦為六十四作鬱厄之辭困于石
據于蒺藜乃申憤以作歌曰殷道溷溷浸濁煩兮朱紫
相合不別兮迷亂聲色信讒言兮閭閻之虐使我愆
兮幽閉牢窸由其言兮邁我四人憂勤勤兮

論衡曰文王飲酒千鍾聖人能以德將酒也

帝王世紀曰文王晏朝不食以延四方之士是以太顛
闕天散宜生南宮适之屬咸至是為四臣文王雖在諸
侯之位襲為西伯紂既囚文王以文王之聖不食其子
羹文王得而食之紂曰誰謂西伯聖者其子羹尚不知
也

魏陳思王曹植文王贊曰於赫聖德實維文王三分有
二猶服事商化加虞芮旁暨四方王業克昭武嗣遂光

又文王赤雀贊曰西伯積德天命攸顧赤雀銜書爰集
昌戶瑞為天使和氣所致嗟爾後王昌期而至

周庾信文王見呂尚贊曰言歸養老垂釣西川岸止磻
石溪惟小船風雲未感意氣怡然有此相望于茲幾年

武王

書曰武王戎車三百乘

兵車一乘步卒七十三人凡二萬一千全數也

虎賁三

百人

虎賁善戰言其猛也

與紂戰于牧野作救誓

尚書中候曰太子發以紂有三仁附

三仁箕子比干微子也

即位

不稱王渡于孟津中流受文命待天謀白魚躍入王舟

王俯取魚長三尺赤文有字題目下名授右

右助也天告以伐紂

之意是其助也

有火自天出于王屋流為赤烏五至以穀俱來

流行也五至猶五來

赤烏成文雀書之福

文王得赤雀丹書武王致赤烏俱應周尚赤故

言成文也

詩曰考卜維王宅是鎬京維龜正之武王成之武王烝

哉

禮曰武王纘太王王季文王之緒一戎衣而有天下身

不失天下之顯名尊為天子富有四海之內宗廟饗之
子孫保之

又曰昔殷紂亂天下脯九侯以饗諸侯是以周公相武
王以伐紂

樂籍耀嘉曰武王承命興師誅商紂萬國咸喜軍渡孟
津前歌後舞後乃太平家給人足酌酒鬱搖

春秋元命苞曰武王駢齒是謂剛強承命誅害以順天

心

史記曰武王即位太公望為師周公旦為輔召公畢公之徒左右修文王業九年冬觀兵孟津為文王木主載以居中軍自稱太子發言奉文王以伐不敢自尊乃告司馬司徒司空遂興師渡河時諸侯不期而會孟津者八百諸侯皆曰紂可伐矣武王曰未可乃還師居二年聞紂昏亂滋甚剖比干囚箕子太師庇少師彊抱其樂器而奔周於是武王乃渡孟津以卒馳紂紂師皆倒兵戰紂軍潰叛走登鹿臺之上蒙衣其珠玉自燔于火而

死王遂入至紂死所自射紂三發而後下車以黃鉞斷
紂頭懸太白之旗紂嬖妾妲己二女皆自殺王又射三
發斬以玄鉞懸其頭小白之旗出復于軍其明日遂除
紂宮誓殷民即帝位

帝王世紀曰武王自孟津還返于周見暘人王自左擁
而右扇之四年起師至鮪水甲子至于商郊牧野王鞭
係解五人侍于前莫肯為王係鞭皆曰臣所以事君王
非為係鞭也王乃釋旄而係之與紂戰紂師敗績擒費

仲惡來紂赴于京自燔于宣室而死乃以大旗麾諸侯
入殷都百姓咸行于郊王使告曰上天降休商人皆拜
王亦答拜以兵人造紂及妲己王親射之三發然後下
車以劍擊之周公為司徒使以黃鉞斬紂頭召公為司
空又使以玄鉞斬妲己明日天雨王命除道修社入商
宮朝成湯之廟登堂見美玉入室見美女王皆取而歸
之諸侯天下聞之以康于財色矣置旌于商容之閭釋
箕子之囚散鹿臺之財發鉅橋之粟以賑貧民命南宮

适伯達史佚遷九鼎于洛邑命闕天封比干之墓殷民咸喜十年冬王崩于鎬殯于岐時年九十三歲矣太子誦立為成王

越書曰八百諸侯皆一旦會于孟津之上不言同辭不呼自來盡知武王忠信欲從伐紂

墨子曰天錫武王黃鳥之旗

淮南子曰武王伐紂渡于孟津陽侯之波逆流而擊疾風晦暝人馬不見於是武王左操黃鉞右執白旄瞋目

而麾之曰余在天下誰敢害我意者於是風霽而波罷

又曰武王克殷欲築宮於五行之山周公曰不可夫五

行之山固塞險阻之地也使我德能覆之則天下納其

貢職者迴也迴造也使我有暴亂之行則天下之伐我難

周公言我有暴亂之行則天下當來伐我無爲於五行之山使天下來伐我者難也言其依德不恃險也

所以三十六世而不奪也

說苑曰武王伐紂過墜斬山過水折舟過谷發梁過山

焚萊示民無返志

成王

史記曰成王少周公攝政管叔蔡叔羣弟疑周公與武
庚作亂叛周周公奉成王命伐誅武庚殺管叔蔡叔以
微子啓代殷後國於宋周公行政七年成王長周公反政
成王北面就羣臣之位成王在鄴使召公復營洛邑周公
復下車視卒營築居九鼎焉曰此天下之中四方入貢
道里均作周官興正禮樂制度於是改而民和睦頌聲興
帝王世紀曰周公爲冢宰攝政成王年少未能治事故

號曰孺子八年王始躬親王事以周公為太師封伯禽于魯父子並命周公拜于前魯公拜于後王以周公有勲勞於天下故加魯以四等之上兼二十四附庸地方七百里革車千乘王既營都洛邑復居艷鎬淮夷徐戎及商奄又叛王乃大蒐于岐陽東伐淮夷七年王崩年五十矣太子釗代立

淮南子曰成王問政於尹逸曰吾何德之行

尹逸史佚也

而

民親佚對曰使之時而敬順之王曰其度安至曰如臨

深淵如履薄冰王曰懼哉王人乎尹逸曰天地之間四海之內善之則吾蓄也不善則吾讐也

呂氏春秋曰旦所朝窮巷之中甕牖之士者七十人文王造之而未遂武王遂而未成周公旦抱少主而成之故曰成王

賈誼書曰周成王問鬻子曰寡人聞聖王在上位使民富且壽夫富則可為也壽則不在天乎鬻子對曰聖王在上位則天下無軍兵之事故諸侯不相攻而民不私

鬪不相殺也則民免於一死而得一生矣聖王在上君積於道而吏積於德民積於用故婦人為其所養民免二死而得二生矣聖王在上則君積於仁而吏積於愛而民積於順則刑罰廢無天遏之誅則民免於三死得三生矣聖王在上則使民以時而用之有節則民無厲疾矣則民免於四死得四生矣

琴操曰周金縢者周公作金縢書也武王薨太子誦襲武王之業年七歲不能統理海內周公攝政是時周公

因誅管蔡之後有謗公於王者言公專國人權詐策謀
將危社稷不可置之成王聞之勃然大怒欲囚周公周
公乃奔于魯而死成王聞公死且怒之且傷之以公禮
葬之天乃大暴風疾雨禾稼皆偃木折傷成王懼發金
滕之書見周公所為武王禱命以身贖之書成王執書
而泣曰誰言周公欲危社稷者取所讒公者而誅之戮
於國天乃反風霽雨禾稼復起成王作思慕之歌

太平御覽卷八十四

欽定四庫全書

子部

太平御覽卷八十五
九至

詳校官侍讀學士臣沈咸熙

員外郎臣牛檢文覆勘

總校官降調編修臣倉聖脈

校對官助教臣胡予襄

謄錄監生臣孔繼峯

欽定四庫全書

太平御覽卷八十五

宋 李昉等 撰

皇王部十

周康王

昭王

穆王

恭王

懿王

孝王

夷王

厲王

宣王

幽王

平王

桓王

莊王

僖王

惠王

襄王

頃王

匡王

定王

簡王

靈王

景王

悼王

敬王

元王

貞定王

哀王

思王

考王

威烈王

安王

烈王

顯王

慎靚王

赧王

周康王

紀年曰成康之際天下安寧刑措四十餘年不用

帝王世紀曰康王元年釋喪冕作誥申諸侯命畢公作策分民之居里于成周之郊王在位二十六年崩子瑕代立是謂昭王

述異記曰廬山有康王谷巔有一城號為釗城天每欲雨輒聞山上鼓角笳簫之聲聲漸至城而風雨晦合村人以為常候傳云此周康王之城康王愛竒好異巡厯名山無遠不至城中每得古器大鼎及弓弩金之屬知非常人之所處也而山有康王之號城又以釗為稱斯

言將有徵

昭王

左傳僖公四年齊侯伐楚楚子使與師言管仲對曰爾
貢包茅不入王祭不共無以縮酒寡人是徵昭王南征
不復寡人是問對曰貢之不入寡君之罪也敢不共給

昭王之不復君其問諸水濱

昭王時漢水非楚境故不受罪也

帝王世紀曰昭王在位五十一年以德衰南征及濟于
漢船人惡之乃膠船進王王御船至中流膠液解王及

祭公俱沒水而崩其佐辛游靡長臂且多力拯得王周人諱之王室於是乎大微王娶於房曰房后生太子滿代立是謂穆王漢上記曰咋額至橫桑三十里桑字本作喪辛游靡取昭王喪處

呂氏春秋曰周昭王親征荆

高誘注曰秦莊王名楚故曰荆

還及涉漢

梁敗王隕於漢中

隕尤粉切
傾隆也

辛游靡拯王北濟

穆王

歸藏曰昔穆王天子筮西征卜吉日龍降於天而道里

脩遠飛而冲天蒼其羽

傳曰穆王有塗山之會

周穆王會諸侯於塗山

又曰昔穆王欲肆其心周行天下將必皆有車轍馬跡
焉祭父作祁招之詩以止王心王是以獲歿於祗宮

史記曰穆王即位春秋已五十矣王道衰微王將征犬
戎祭公謀父諫曰不可王遂征之得四白狼四白鹿以
歸自是荒服者不至諸侯有不睦者甫侯言於王作修
刑辟命曰甫刑穆王立五十五年年一百五歲而崩子

恭王繫扈

穆天子傳曰天子北征乃絕漳水於是即井鉞山之
下癸未雨雪天子獵于鉞山之西河乃至于崑崙之丘以

觀眷山之寶乃披圖視典用觀天子之寶器

省河所出禮圖

玉

果

石似美玉所謂如果者也

璿珠

璿玉類也今音璇

燭銀

有精光如燭也

黃金之膏

金膏亦猶玉膏皆其精液

宿於崑崙之阿赤水之陽

崑崙山有赤水東北流見山海

經也升于崑崙之丘以觀黃帝之宮

黃帝巡視四海登崑崙山而起宮室其上

見新語也

天子北征舍乎珠澤

此澤出珠乃因名之穆王北征舍于此也

北昇于

脊山之上以望四野曰春山是惟天下之高山者也癸

丑天子乃遂西征吉日甲子天子賓于西王母

西王母
如人虎

齒蓬髮戴勝善嘯紀年曰穆王十七年西征于
崑崙之丘見西王母其年辛丑乃賓于招宮

乃執白

珪玄璧以見西王母

執贊者
致敬也

獻錦組百純乙丑天子觴西

王母于瑤池之上西王母為天子謠

謠徒
歌也

曰白雲在天

丘陵自出道里悠遠山川間之子將無死

將
請

尚能復來

尚庶
幾也

已酉天子飲于溥水之上六師之人畢至于曠原

乃奏廣樂六師之人翔攷于曠原

翔猶
遊也

得獲無疆

無疆
猶無

也限鳥獸絕羣言取盡也

帝王世紀曰穆王修德教會諸侯於塗山命呂侯為相或謂之甫侯五十一年王一百歲老耄以呂侯有賢能之德於是乃命呂侯作呂刑之書五十五年王年百五歲崩于祗宮

揚子法言曰周穆王少不好學至乎耄長

抱朴子曰周穆王南征一軍盡化君子為猿為鶴小人為蟲為沙

共王

帝王世紀曰共王能庇昭穆之闕故春秋稱之周自共王至夷王四世年紀不明是以歷依魯為正王在位二十年崩子囂代立

懿王

史記曰懿王之時王室遂衰詩人作刺懿王在位二十五年崩共王弟辟方立為孝王

帝王世紀曰懿王二年徙都犬丘

孝王

史記曰孝王在位十五年崩諸侯復立懿王太子燮是為夷王

夷王

禮曰禮天子不下堂而見諸侯下堂而見諸侯天子之失禮也由夷王已下

史記曰夷王崩子厲王胡立

紀年曰夷王二年蜀人呂人來獻瓊賓于河用介珪三

年王致諸侯烹齊哀公于鼎

帝王世紀曰夷王即位諸侯來朝王降與抗禮諸侯德之三年王有惡疾愆于厥身諸侯莫不並走羣望以祈王身十六年王崩

厲王

史記曰厲王即位三十年好利近榮夷公大夫芮良諫王不聽卒以榮為卿士用事王行暴虐侈傲國人謗王召公諫曰民不堪命王怒得衛巫使監謗以告則殺之

諸侯不朝三十四年王益嚴國人莫敢言道路以目三年相與叛襲厲王出奔于彘太子靜匿召公之家國人聞乃圍之召公以其子代太子竟得脫召公周公二人相共行政號曰共和十四年厲王死于彘太子靜長於召公家二相乃共立之是為宣王

帝王世紀曰厲王荒耽于酒淫婦人

宣王

史記曰宣王即位二相輔之修政法文武成康之遺風

諸侯復宗周十二年魯武公來朝宣王不修藉於千畝
虢文公諫曰不可王弗聽三十九年戰于千畝王師敗
績于姜戎王在位四十六年崩子幽王宮涅立

帝王世紀曰宣王元年以召穆公為相秦仲為大夫誅
西戎是時天大旱王以不雨遇災而懼整身修行欲以
消去之祈于羣神六月乃得雨大夫仍叔美而歌之今
雲漢之詩是也是歲西戎殺秦仲王於是進用賢良樊
侯仲甫尹吉甫程伯休父虢文公申伯韓侯顯父南仲

方叔仍叔名穆公張仲之屬並為卿佐自厲王失政獫狁荆蠻交侵中國官政墮廢百姓離散王乃修復宮室興賢人納規諫安集兆民命南宮仲召虎方叔吉甫並正四方復先王境土繕車徒興畋狩禮天下喜王化復行號稱中興

墨子曰周宣王殺杜伯不辜杜伯曰死若有知三年必使君知之宣王田於圃田從人滿野日中杜伯乘白馬素車朱衣朱冠手執朱弓挾朱矢射王而中其心折脊

伏弦而死從者莫不見聞

幽王

國語曰幽王之二年西周三川皆震伯陽父曰周將亡矣夫天地之氣不失其序若過其序民亂之也陽伏而不能出陰迫而不能蒸於是地震今三川實震陽失其所而填於陰也

史記曰幽王愛褒姒生子伯服竟廢申后及太子以褒姒為后以其子伯服為太子褒姒為人不好笑悅之萬

方故不笑幽王為烽燧大鼓寇至則舉烽火於是諸侯
悉至至而無寇褒姒乃大笑幽王悅之為數舉烽火其
後諸侯並不至幽王以號石父為卿用事國人皆怨之
石父為人佞巧善諛好利王用之幽王又廢申后去太
子也申侯怒乃與西夷犬戎共攻幽王王舉烽火徵兵
兵莫至遂殺幽王驪山之下虜褒姒盡取周之賂而去
於是諸侯乃即申侯而共立故太子宜臼是為平王以
奉周祀平王乃東遷洛邑避戎寇也幽王在位一十一

年

紀年曰幽王立褒姒之子伯服以為太子

瑣錄曰宣王元后不恒暮月生子后弗敢舉天子召問羣臣及元史史臣荅曰若男子也身體有不全諸骨節有不備立為天子也將必喪邦天子曰若而不利余一人命棄之仲山父曰天子年長也而未有子或者天將以是棄周雖棄之何益天子弗棄之

平王

史記曰平王之時王室微弱而諸侯以強併弱齊楚秦
晉始大政由方伯五十一年平王崩太子泄父早死立
其子林是為桓王桓王平王之孫也

帝王世紀曰平王元年鄭武公為司徒與晉文侯股肱
周室夾輔平王率諸侯戮力一心東遷洛邑

桓王

史記曰桓王在位二十三年崩子莊王佗立

帝王世紀曰桓王既失於信禮義陵遲男子淫奔讒偽

並作諸侯背叛構怨連禍九族不親故詩人刺之

莊王

史記曰莊王四年周公黑肩欲殺莊王而立王子克辛
伯告王王殺周公王子克奔燕十五年莊王崩子僖王
胡齊立

僖王

史記曰僖王三年齊桓公始伯五年僖王崩子惠王閔
立

帝王世紀曰僖王自即位以來變文武之制作元黃華麗之飾宮室峻而奢侈故孔子譏焉五年王崩子涼洪代立

惠王

左傳有神降於莘惠王問內史過曰是何故也對曰國之將興明神降之監其德也將亡又降之觀其惡也故有得神以興亦有以亡虞夏商周皆有之

史記曰初莊王嬖姬姚生子頹頹有寵及惠王即位奪

其大臣園圃之田以為囿故大夫邊伯等五人作亂謀召燕衛之師伐惠王惠王奔溫居鄭之櫟立僖王弟子頹為王遂享諸大夫樂及徧舞鄭虢君怒四年鄭與虢君伐殺子頹復入惠王惠王二十五年崩子襄王鄭立

襄王

史記曰襄王母早死後母曰惠后后生叔帶有寵襄王畏之三年叔帶與戎翟謀伐襄王襄王欲誅叔帶叔帶奔齊齊桓公使管仲平戎于周十五年王以翟師伐鄭

王德翟人將以其女為后富辰諫不聽十六年王絀翟
后翟人來誅殺譚伯富辰以其屬死之初惠后欲立王子
帶故以其黨開翟翟人遂入周襄王出奔于鄭鄭居王
于鄭帶立為王取襄王所絀翟后與居温十七年襄王
乃告急於晉晉文納王而誅叔帶襄王於是賜晉文公
鉅鬯弓矢為伯以河內地與晉二十年晉文公乃召襄
王襄王會之河陽書曰天王狩于河陽三十二年襄王
崩子頃王士臣立

頃王

史記曰頃王六年崩子匡王班立

匡王

史記曰匡王六年崩弟瑜代立是為定王

定王

史記曰定王元年楚伐陸渾之戎次於洛使人問九鼎之輕重王使王孫滿應設以辭楚兵乃去二十一年定王崩子簡王夷代立

簡王

史記曰簡王十三年晉殺其君厲公迎子周於周立之
為悼公十四年簡王崩子靈王泄心立

靈王

傳曰王子朝使告白諸侯曰定王六年秦人降妖曰周
其有頽王亦克能修其職至于靈王生而有頽王甚神
聖無惡於諸侯

國語曰靈王二十二年穀維鬪將毀王宮

賈逵注曰穀維
二水似鬪洛在

王城南穀
在城北

王欲壅之太子晉諫曰不可晉聞古之長民

者不墮山不崇藪不竇澤

實決也

夫山土之聚也藪物之

歸也川氣之導也澤水之鍾也天地成聚於高歸物於

下疏為川谷以導其氣陂塘汚庫以鍾其美

聚合萬物之美也

伯禹封崇九山決泊九川陂障九澤豐殖九原故天無

伏陰地無散陽觀之詩書與民之憲言則皆亡主之為

也王其圖之王卒壅之亂於是始

史記曰靈王在位二十七年崩子景王貴立

景王

左傳天王將鑄無射

周景王也無射鐘名

伶州鳩曰王其以心疾

死乎夫樂天子之職也夫音樂之輿也

樂因音而行

而鐘音之

器也

音由器以致

天子省風以作樂

省風俗作樂以移之

器以鍾之

鍾

也輿以行之

樂須音而行

小者不窳

窳他彫切也

大者不楸

楸橫大不

人也音畫

則和於物物和則嘉成

喜樂成也

故和聲入於耳而藏

於心心億則樂

億安也

窳則不咸

不充滿人心

楸則不容

心不堪容

心是以感感實生疾今鐘楸矣王心弗堪其能久乎

史記曰景王太子聖而早卒王愛子朝欲立之會崩子
丐之黨與爭立國人立長子猛為王子朝攻殺猛猛為
悼王晉人攻子朝而立丐是為敬王

帝王世紀曰景王遇心疾崩于榮錡氏單穆公與劉文
公立太子猛是為悼王景王在位二十五年

悼王

帝王世紀曰悼王以景王二十五年四月始即位十一
月崩王立凡二百日故春秋稱王子猛卒不成喪故不

言天王崩也立王母弟丐是為敬王

敬王

史記曰晉定公遂入敬王于周四十四年敬王崩子元
王仁立

元王

史記曰元王八年崩子貞定王介立

貞定王

史記曰貞定王十六年三晉滅智伯分其地二十八年

崩子去疾立是為哀王

皇甫謐曰真定

哀王

帝王世紀曰哀王即位三月弟叔襲殺王而立是為思王

思王

帝王世紀曰思王即位五月弟嵬攻殺王而自立是為考王

考王

史記曰考王十五年崩子威烈王午立

威烈王

帝王世紀曰威烈王在位二十四年崩子驕立是為安

王

安王

史記曰安王二十六年而崩子烈王喜代立

帝王世紀曰安王子喜立是為烈王

烈王

史記曰烈王十年崩弟扁立是為顯王

顯王

史記曰顯王三十五年致文武胙於秦惠王四十四年秦惠王稱王其後諸侯皆為王四十八年顯王崩子慎覲王定立

帝王世紀曰顯王元年趙成侯韓哀侯來攻周二年西周威公之嗣曰惠公始封惠公少子班於鞏以奉王號東周惠公周於是始分為東西王室微弱政在西周

慎靚王

帝王世紀曰慎靚王六年崩子延代立是為赧王

赧王

史記曰東周西周分治赧王徙都西周五十九年秦攻
西周王奔秦頓首受罪盡獻其邑三十六口三十萬秦
受其獻而歸其君於周周王赧卒東周遂以亡秦取九
鼎寶器而遷西周公於音憚憚狐後七歲秦莊襄王滅東
西周皆入於秦周遂不祀

漢書曰幽平之後日以陵夷至乎崎嶇河洛之間分為

二周然天下謂之共主

雖後微弱猶共以為主

強大弗之敢傾歷

載八百餘年數極德盡暨於赧王降為庶人號位已絕於天下尚枝葉相持莫得居其虛位四海亡主三十餘年

帝王世紀曰赧王二十七年冬十月秦昭襄王乃僭號西帝齊閔王稱東帝十一月齊秦復去帝號為王四十五年王如秦得罪於秦秦攻周或說秦王乃止王號雖

居天下之位為諸侯之所侵逼與家人無異多貫於民無以歸之乃上臺以避之故周人因名其臺曰逃債之

臺洛陽南宮諂臺

諂音夷又音尸移切

是也五十九年秦攻韓魏

趙大破之王懼乃背秦與諸侯合從將天下銳師出伊闕攻秦秦昭襄王大怒使將軍繆攻周王王恐乃入秦頓首受罪盡獻其邑秦盡納其獻使赧王歸于周降為庶人以壽終

王逸正部曰幽厲禮樂崩壞諸侯力攻轉相吞滅德不

能懷威不能制至於王赧遂喪王計

太平御覽卷八十五